

NO. SOALAN: 85

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : TUAN NGA KOR MING [TAIPING]

TARIKH : 07.08.2017

SOALAN : 91

Tuan Nga Kor Ming [Taiping] minta PERDANA MENTERI menyatakan :-

(a) berapakah peruntukan tahunan Kerajaan kepada SPRM dari 2009 hingga 2017 dan berapakah jumlah bilangan kakitangan yang ada bersama SPRM; dan

(b) adakah Kerajaan mempunyai rancangan merombak struktur SPRM supaya ia menjadi satu Suruhanjaya Pencegahan Rasuah yang BEBAS.

JAWAPAN: YB SENATOR DATUK PAUL LOW SENG KUAN
MENTERI DI JABATAN PERDANA MENTERI

Tuan Yang di-Pertua,

Jawapan (a)

Jumlah peruntukan tahunan Kerajaan kepada Suruhanjaya Pencegahan Rasuah Malaysia (SPRM) dari tahun 2009 hingga 2017 adalah sebanyak RM2,079,104,500.00.

Terdapat 2 kategori kakitangan SPRM iaitu pegawai Suruhanjaya yang mempunyai kuasa di bawah Akta SPRM 2009 dan Staf Gunasama iaitu kakitangan yang menjalankan tugas-tugas pentadbiran. Sehingga 1 Julai 2017, jumlah pengisian jawatan pegawai Suruhanjaya adalah seramai 1,802 orang manakala jumlah pengisian jawatan staf gunasama adalah seramai 788 orang. Pada masa ini pengisian jawatan SPRM adalah tertakluk kepada dasar Pelaksanaan Inisiatif Sumber Manusia Secara Optimum dan perlu mendapat pertimbangan kelulusan Kerajaan melalui Jabatan Perkhidmatan Awam (JPA) dan Kementerian Kewangan.

Jawapan (b)

SPRM adalah sebuah entiti bebas yang tidak tertakluk atau boleh dipengaruhi mana-mana pihak. Fungsi, tanggungjawab dan kuasa SPRM adalah jelas sebagaimana peruntukan undang-undang di bawah Akta SPRM 2009. Akta tersebut juga memperuntukkan secara khusus tanggungjawab dan mekanisme *check and balance* di bawah seksyen 13, 14 dan 15 untuk memastikan kebebasan dan keberkesanan penunaian fungsi SPRM melalui peranan Lembaga Penasihat Pencegahan Rasuah, Jawatankuasa Khas Mengenai Rasuah dan Jawatankuasa Aduan. Bagi mengukuhkan lagi kerangka *check and balance* itu, ditambahkan dua lagi entiti iaitu Panel Penilaian Operasi serta Panel Perundingan Dan Pencegahan Rasuah yang diwujudkan secara pentadbiran untuk turut memastikan kebebasan dan keberkesanan penunaian fungsi SPRM.

Yang Berhormat, komitmen Kerajaan untuk memastikan kebebasan SPRM, bukan sahaja kepada rakyat negara ini, malahan kepada masyarakat antarabangsa. Sebagai negara yang telah meratifikasi perjanjian *United Nations Convention Against Corruption* (UNCAC) pada tahun 2018, Malaysia sekaligus bertanggungjawab mematuhi obligasi Artikel 6 perjanjian tersebut, untuk mewujudkan sebuah entiti pencegahan rasuah yang berkesan dan bebas daripada apa-apa pengaruh tidak wajar. Prinsip keberkesanan dan kebebasan itu adalah selaras dengan ciri-ciri yang digariskan dalam *Jakarta Statement on Principle of Anti-Corruption Agencies* yang disepakati oleh *International Association of Anti-Corruption Agencies* (IAACA) yang diwujudkan untuk mempromosikan pematuhan berkesan terhadap UNCAC. Malaysia pada dasarnya mematuhi prinsip-prinsip

yang digariskan, kecuali penambahbaikan mekanisme pelantikan dan penamatan tugas bagi jawatan Ketua Pesuruhjaya SPRM supaya diletakkan di bawah Perlembagaan Persekutuan serta mewujudkan kapasiti untuk SPRM melantik dan menamatkan perkhidmatan pegawai Suruhanjaya ini. Memorandum yang mencadangkan supaya pelantikan dan penamatan tugas bagi jawatan Ketua Pesuruhjaya SPRM dibuat di bawah Perlembagaan Persekutuan dan supaya diwujudkan sebuah suruhanjaya perkhidmatan khusus bagi melantik dan menamatkan perkhidmatan pegawai Suruhanjaya SPRM telah dipersetujui oleh Jemaah Menteri dalam mesyuarat pada 1 Oktober 2014, namun cadangan tersebut masih memerlukan sokongan majoriti daripada 2/3 Ahli-ahli Parlimen.

Sekian, terima kasih.

SOALAN (86)**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN
TARIKH : 7 OGOS 2017
[ISNIN]
DARIPADA : YB DATO' DR. TAN KEE KWONG
[WANGSA MAJU]

SOALAN :-

YB Dato' Dr. Tan Kee Kwong [Wangsa Maju] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan adakah terdapat jangka hayat bagi penggunaan lif bagi mana mana perumahan yang dibina.

JAWAPAN :-

Tuan Yang di-Pertua,

Untuk makluman Ahli Yang Berhormat, berdasarkan kajian yang dilaksanakan dalam kalangan pihak pengeluar lif dan Jabatan Keselamatan dan Kesihatan Pekerja (JKKP), setakat ini tidak ada satu penetapan yang khusus dikeluarkan oleh pihak pengeluar lif mahupun dari Jabatan Keselamatan dan Kesihatan Pekerjaan (JKKP) berkaitan tempoh hayat sesebuah lif. Ianya bergantung kepada tahap penggunaan, keselamatan dan kekerapan penyelenggaraan terhadap sesebuah lif tersebut.

Walau bagaimanapun pihak Jabatan Kerja Raya Malaysia (JKR) ada mengeluarkan Garis Panduan Piawaian JKR Bagi Jangka Hayat Aset Infrastruktur dan Aset Kejuruteraan melalui Surat Arahan KPKR Bil. 1/2013 bertarikh 10 Januari 2013.

Dokumen tersebut menyatakan tempoh jangka hayat berguna bagi sesebuah lif adalah selama 15 tahun. Jangka hayat berguna bermaksud

jangkaan tempoh sesuatu aset berfungsi dalam memberi tahap perkhidmatan/prestasi yang ditetapkan oleh sesuatu organisasi.

Piawaian ini juga adalah terpakai kepada semua Kementerian/ jabatan/ Agensi Kerajaan Persekutuan, Perkhidmatan Negeri, Badan Berkanun Persekutuan dan Negeri serta Pihak Berkuasa Tempatan tertakluk kepada penerimaan dan pengubahsuaian sewajarnya oleh pihak-pihak berkuasa berkenaan.

Kementerian Kesejahteraan Bandar,
Perumahan dan Kerajaan Tempatan

Julai 2017